

1. Eva

Genesis 2:15-25; Genesis 3:6-21

VERWELKOMING:

5 MIN

YSBREKER:

25 MIN

- Wat is/was jou ma se beste eienskap? En haar slegste?
- Watter van God se opdragte is vir jou die moeilikste om te gehoorsaam?

AANBIDDING:

5 MIN

Neem 2 minute en praat oor die volgende:

Hoe is God soos 'n ma? Gee daarna kans vir stilgebed waar elkeen God kan aanbid vir daardie eienskappe.

BYBELSTUDIE:

35 MIN

Eva: Naam wat die eerste mens aan sy vrou gegee het, Gn. 3:10. In Hebreeus lui die naam *Chawwá* = "lewe". In Gn. 3:20 staan dat die mens sy vrou Eva genoem het omdat sy moeder geword het van alles wat lewe. In Gn. 4:1 het die septuagint (Griekse vertaling van die Ou Testament): Eua. Die Vulgaat (die Latynse vertaling) het in sowel Gn. 3:20 as 4:1: Heva. So het ons aan ons Eva gekom. Septuagint lees in Gn. 3:20 zoé = lewe. Eva is deur die Here God geskape uit een van die ribbebene van die mens, nadat Hy 'n diepe slaap oor die mens laat kom het, Gn. 2:21, 22. Sy was 'n hulp wat by hom gepas het, Gn. 2:18. Nadat sy deur die Slang verlei is om van die boom van die kennis van goed en kwaad te eet, het sy op haar beurt haar man verlei om van die vrug te eet, Gn. 3:1-7; 2 Kor. 11:3; 1 Tm. 2:13e.v. Die Goddelike vonnis was dat die moeite van haar swangerskap grootliks vermeerder sou word, maar desnieteenstaande sou haar begeerte na haar man uitgaan en heerskappy van die man oor haar, Gn. 3:16. Eva is saam met Adam uit die Paradys verdrywe, maar het die Moederbelofte, Gn. 3:15, wat teen die slang uitgespreek is, saamgeneem. Sy het die moeder geword van Kain, Abel, en Set, asook van ander seuns en dogters, Gn. 4:1, 2, 25; 5:1-5.

Lees Genesis 2:15-25 deurdat elkeen een vers hardop lees.

- God maak vir Eva om Adam se alleenheid weg te vat (vers 18) en vir hom "'n helper, 'n gelyke" te wees (vers 20). Wat sê dit vir die rol van 'n vrou in die huwelik?
- God maak Eva uit Adam se ribbebeen. 'n Teoloog het die betekenis as volg beskryf: *"Nie uit sy hoof om oor hom te heers, of uit sy voete om op getrap te word nie, maar uit sy sy om sy gelyke te wees, onder sy arm vir beskerming, en naby sy hart om bemin te word."* Stem julle daarmee saam?
- In Genesis 2:15-25 hoor ons hoe God die huwelik instel in die paradys **VOOR** die sondeval. Wat beteken dit vir ons dat daar huwelik was vóór daar sonde was?
- In vers 24 hoor ons dat man en vrou "een" word. Op watter gebiede moet mense in die huwelik "een" wees? Wat maak dat mense vandag in hulle huwelike "twee" bly? En "drie" word?

Lees Genesis 3:1-20 deurdat elkeen een vers hardop lees.

- In vers 2 hoor ons hoe Eva God se bevel bietjie wysig. Hoekom doen sy dit? Hoe doen ons dit vandag ook?
- In vers 12 en 13 probeer Adam en Eva die skuld af te skuif op iemand anders. Hoekom is dit so moeilik om skuld te erken? Wanneer is dit vir jou die moeilikste om skuld te erken? Waar skuif jy die skuld op ander?
- Wat maak Eva besonders?

DIENSWERK:

5 MIN

Wat kan julle hierdie week doen om julle verhouding/huwelik te versterk?

Wat kan julle doen om mekaar te help

GEBEDSRIGLYN:

10 MIN

Vra vir vier persone om elkeen een van die volgende elemente van gebed te hanteer. Bespreek dan as groep wat julle wil bid:

1. Lofprysing: loof God vir wie Hy is
2. Danksegging: bedank God vir wat Hy doen of gedoen het
3. Smeking: vra vir God
4. Voorbidding: bid vir mense/groepe

ADMINISTRASIE:

5 MIN